

“Isumaginninnermi ikiorsiissutit tunniunneqartartut atuuttut pillugit kaajallaasitaq nr. 294 ulloq 1. Januaari 2022” aallarnerfigalugu atuutilersumi §11 allannqorteqqullugu Naalakkersuisut peqquneqarnissaannik inatsisartut aalajangiiffigisassaattut siunnersuut, ulloq 1. Januaari 2023 atuutilersumik nalinginnaasumik ilaqutariinnut paarsisartunut paaqqinninersiutit marloriaatinngortittussanngorlugit

(Inatsisartunut ilaasorta, Jess Svane, Siumut)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Siullermeerneqarnera

Aalajangiiffigisassatut siunnersuummut nassiiunneqartumut Naalakkersuisut qujapput.

Meeqqat inuusuttullu inissinneqarsimasut ilaasa ilaqutariit paarsisartunut toqqissisimasunut inissinneqarnissartik ulloq unnuarlu paaqqinnittarfimmiit orniginartinnerusarneranut atatillugu siunnersuuteqartoq Naalakkersuisut isumaqatigaat. Meeqqanut nukanganerusunut meeqqanullu annikinnerusunik ilungersuuteqartunut tunngatinneqarneruvoq. Taamaattorli meeqqanik inuusuttunillu pissusilersornikkut- ingerlalluarnikkullu ajornartorsiuteqartunik aammalu katsorsartinnissamik pisariaqartitsisunik ulloq unnuarlu paaqqinnittarfimmut inissiinissamut pisariaqarsinnaavoq.

Oqartussaasut angerlarsimaffiup avataanut ilaqutariinnut paarsisartunut meeqqamik inissiisariaqaraangata, meeqqap ilaqutariit toqqissisimasut pisariaqartittarpai. Taamaattumik ilaqutariit paarsisartut akuerisaasutut misigisimanissaat meeqqallu ilorrisimaarluni inuunissaa pitsaanerpaamik tapersersorneqarnissaa anguniarlugu aningaasartuutit matussuserneqarnissaat tamatumunnga pingaaruteqarpoq.

Ilaqutariit paarsisartut paaqqinninersiutaannik qaffaanissaq maannakkut kommuninut periarfissaalereerpoq. Suliniutit immikkut ittut tunngavigalugit paaqqinninersiutinik qaffaanissaq pillugu kommuni inissiisoq aalajangiisnaavoq. Suliani tamani nalilersueqqissaarneq tunngavigalugu tamanna pisassaaq.

Kommuni inissiisoq paarsinermut paaqqinninersiutinik qaffaanissamut periarfissaq piumasaaqatillu pillugit ilaqutariinnut paarsisartunut paasissutissiissaaq. Paaqqinninersiutit massakkumut 700%-t tungaannut qaffanneqarsinnaapput. Kalaallit Nunaanni Naatsorsueqqissaartarfiata saqqummersitaa: 18. Maj 2021-mit “2020-mi ilaqutariit paarsisartut” kiisalu paaqqinninersiutit marloriaataanniit annertunerusunik avitsinissamut periarfissaq kommunit atorluarneq ajoraat Naatsorsueqqissaartarfimmiit paasissutissat ilassutaasut nalorninartortaqartut takutippaat. Aamma paarsisartunut paaqqinninersiutinik qaffanneqarsimasunik ilaqutariit paarsisartut amerlanersaat tigusartagaqartut allassimavoq.

Paarsisartunut paaqqinninersiutinik qaffaanissamut periarfissanik sullissisup aqutsisinaanissaa ajornannginnerulersinniarlugu, Isumaginninnermut Aqutsisoqarfik siunnersuinissamut suleriaatsit arfineq-marluusut aqqutigalugit suliaqarsimavoq, tassani kommunit ilaqutariit paarsisartut suliniutaannik nalilersuinissamut kommuninik siunnersuilluni taannalu tunuliaqutaralugu paarsisartunut paaqqinninersiutinik aalajangersaalluni. Taamaattorli pisunut malinnaaniarnermi siunnersuineq kommuninut ajornakusoorsinnaavoq.

Ilaqutariit paarsisartut akissarsiaannik qaffaanissamut piumasaaqatit aalajangersimasut sorliit atussanersut kommuninut sullissisunullu ajornannginnerulissapput ersarinnerulerlutillu.

Isumaginninnikkut ikiorsiissutit akigititanut kaajallaasitap ukiumut ataasiarluni saqqummersinneqartassaaq taannalu isumaginninnikkut ikiorsiissutit annertussusaannik, isumaginninnikkut inatsimmi aningaasaqarnikkullu inatsimmi aalajangerneqarsimasumik, nalunaarutiginninneruvoq.

Paarsisartunut paaqqinninersiutit qanoq avinneqartarnissaannut kommunit ersarissumik sinaakkuteqarnissaat Naalakkersuisut isumaqarfigaat. Taamaattumik ilungersunartup allannguiffigineratigut, ersarissarneratigut aamma paarsisartut paaqqinninersiutaannik aalajangersaasarnerup inatsisaanik itisilerneqarneratigut pitsaaneruseqarsumik aaqiiffiqarsinnaanerani Naalakkersuisut isumaqarput, taamaasilluni agguasarnermut piumasaaqatit ersarinnerulissammata.

Tamanna tunuliaqutaralugu allannguutissatut siunnersuummik Naalakkersuisut imatut ittumik inassuteqarput:

Ilaqutariit paarsisartut pillugit nalunaarussiaq nutaamik Naalakkersuisut suliakkerneqarput, tassani ilaqutariinnut paarsisartunut paaqqinninersiutit aalajangersartarnerannut piumasaaqatit ersarinnerulissapput. Nalunaarussiaq kingusinnerpaamik ulloq 1. januar 2023 atuutilersinneqassaaq.